



IMPORTANT NOTE 重要告示:

This script is only for reference purpose. Rights for performance or adaptation is protected by copyright and their permission must be sought from the author.

以下劇本只作參考用途，如欲採用或改編，須先取得作者同意。

Name of School : TAK SUN SCHOOL

學校名稱 : 德信學校

Name of Play 劇名 : 人生成績單

Script writer 劇作者 : 周昭倫 (校外導師)

Synopsis 故事大綱:

在奇幻國度裏，人民到了某天便會收到人生成績單，上面寫著最合適自己的職業。只要我們能聽從指引，便能樂知天命地開心過活。然而，主人翁森仔收到的成績單竟是一片空白，他頓時感到前路一片茫然。然後，他遇上古怪的無臉人、克己復禮的古人和放蕩不羈的年輕人。究竟森仔可從他們身上得到甚麼啟示？他又可否尋得真正屬於自己的人生目標呢？究竟我們的人生應該按照被安排好的「命運」發展，還是自己闖出一片天會更幸福？天生我才必有用嗎？人生目標應以自己的福祉，還是「三不朽」的價值觀豈有依歸？



IMPORTANT NOTE 重要告示:

This script is only for reference purpose. Rights for performance or adaptation is protected by copyright and their permission must be sought from the author.

以下劇本只作參考用途，如欲採用或改編，須先取得作者同意。

第一場

說書人： 演出劇目：「人生成績單」。第一場。

喺一個風和日麗嘅早上，每個學生都懷著不同嘅心情返到學校。有人興奮期待，見到對方會互相打招呼，寒暄一番。不過，亦有人感到忐忑不安，心情七上八落，就好似我哋嘅主角森仔。(停頓)林伯係呢間學校嘅校工，心哋好好，佢留意到森仔唔開心，就上前同佢打招呼。

林伯： 森仔

森仔： …林伯

林伯： 唔同朋友仔傾計？佢哋蝦你呀？

森仔： 唔係呀…

林伯： (在袋中取出糖果) 送比你食。(森仔接過糖果) 你哋終於都嚟到呢一日。(森仔點頭) 唔使咁緊張嘅。人人都會收到「人生成績單」。

森仔： 我唔明點解會有「人生成績單」？

林伯： 哈哈，「人生成績單」可以話你知，你有咩專長，有咩弱點，同埋你將來應該做啲咩。咁你就唔使浪費時間。

森仔： (一頓) 林伯，咁你以前嘅成績係點架？

林伯： 我！？你估吓？做校工㗎~~~

森仔： 咁---

林伯： 點呀？估唔到？

森仔： (擰頭)咁你開唔開心？

林伯： 開心，我好滿意自己嘅工作，做個盡忠職守嘅校工。

森仔： 係呀，個個都話你好好人架。

林伯： 咁你呢？你估你將來會做咩呀？

森仔： ……



IMPORTANT NOTE 重要告示:

This script is only for reference purpose. Rights for performance or adaptation is protected by copyright and their permission must be sought from the author.

以下劇本只作參考用途，如欲採用或改編，須先取得作者同意。

- 說書人： 嘍，睇吓另一邊，有位同學著上醫生袍，仲有人向佢歡呼。不過，唔知點解，佢反而悶悶不樂，佢就係昭仔。
- 昭仔： (悶悶不樂) 睇吓我呢件醫生袍，爹哋今朝早送比我架。
- 同學一： 嘩，好犀利呀。昭仔，你成績咁好，你將來實做醫生喇！
- 同學二： 做醫生好偉大架，可以救好多人！
- 同學三： 又可以發明疫苗對付啲新病毒。
- 昭仔： 今日，收到成績單之後，我就會…做醫生。
- 說書人： 喺度用間尺當劍嘅同學就叫做速龍，佢係運動精英，佢嘅劍術真係非常高明，其他同學都好崇拜佢！
- 速龍： (刺劍) 嘿！嘿！嘿！
- 同學們： (照著做) 嘿！嘿！嘿！
- 速龍： 今日之後，我就會成為一個劍擊運動員！
- 同學四： 梗係喇，從來都無人試過體育科可以次次都攞 A 架。
- 同學五： 你第一次參加聯校劍擊比賽就贏小學組總冠軍。
- 同學六： 將來實會拎奧運金牌！
- 同學們： 金牌！金牌！金牌！
- 速龍： 雖然嗱咁媽咪一直想我做工程師，反對我做運動員，但係只要今日收到「人生成績單」，上面寫住：「運動員」之後，咁佢哋就無得再反對喇！
- 眾同學： 好嘢！
- 說書人： 仲有呢位曲奇仔，聽佢個名，就知佢好可愛。佢仲好鍾意講笑話添。
- 曲奇仔： 森仔，講個笑話你聽吓。從前~~~
- 林伯： 曲奇仔，你咁鍾意講笑話，有無諗過今日嘅成績表會派你將來做咩職業呀？
- 曲奇仔： 我無諗過喎~~~做咩我都無所謂。
- 林伯： 我話你最啱嘅就係做演員，喜劇演員，好似周星星咁。



IMPORTANT NOTE 重要告示:

This script is only for reference purpose. Rights for performance or adaptation is protected by copyright and their permission must be sought from the author.

以下劇本只作參考用途，如欲採用或改編，須先取得作者同意。

曲奇仔： 周星星！？都好啱。(歡天喜地走開，找其他同學說笑話) 喂，我講過笑話你哋聽吖~~~

林伯： 森仔，你真係無諗過你將來會做啲乜？

森仔： 唉~~~我...我都唔自己有咩目標~~~~

林伯： 噢...從好啱方面諗，可能咁仲好，人生成績單上面派你去做科學家，你咪去做科學家；派你去做工程師，你咪去做工程師；派你去做消防員，你咪去做消防員囉，咁可能仲好呢!?

森仔： 我---

(傳來學校鐘聲)

林伯： 好喇，夠鐘派人生成績單喇。

(眾人神情立即認真起來)

校長： 各位同學早晨，恭喜大家，終於嚟到呢一日。稍後，你哋每人就會收到一張人生成績單，咁你哋就可以知道日後嘅人生路向。(眾人難掩興奮的心情，森仔除外) 林伯，麻煩你為大家派成績單。

說書人： 林伯於是就為大家派發成績單。每位同學收到後，都好心急即刻打開嚟睇。每人起初的反應都唔一樣，但最後都會接受結果。最後操場上，只剩低四位同學：昭仔、速龍、曲奇仔和森仔。佢哋慢慢逐一打開成績單。

昭仔： (揭開成績單查看，一頓) Yes !

森仔： 恭喜你，可以做醫生！

昭仔： 唔係呀，「畫家」，成績單上面寫住：「畫家」！其實我最想做一個畫家。

森仔： 你唔係想做醫生咩？

昭仔： 人人都覺得我成績好就一定做醫生，無人睇得出我嘅藝術天份，連我嗲咗媽咪都睇唔出。呢張成績單終於可以證明，我最應該做嘅就係畫家。

(昭仔拿著成績單，歡天喜地離開)

森仔： 速龍，你呢？

速龍： (高舉成績單) 仲使講，我要做一個金牌劍擊運動員。(離開)



IMPORTANT NOTE 重要告示:

This script is only for reference purpose. Rights for performance or adaptation is protected by copyright and their permission must be sought from the author.

以下劇本只作參考用途，如欲採用或改編，須先取得作者同意。

曲奇仔： (看著自己的成績單) 老師！？

森仔： 唔係喜劇演員？

曲奇仔： 都好，我將來做咗老師，要令課室充滿笑聲！(離開)

說書人： 最後只剩低森仔，佢唔夠膽打開「人生成績單」。

校長： 森仔，點解你仲唔打開你嘅成績單？

森仔： 校長...我，有啲緊張...

林伯： 唔使擔心，只要打開，就知道你將來嘅目標。

校長： 森仔，如果你再唔打開，你就會被取消資格，被呢個社會淘汰！

林伯： 森仔(倫焯軒)，快啲打開佢喇...

森仔： 咁...

校長： (滿有威嚴)如果...你唔遵守社會上嘅規則，無人可以幫到你架喇。

林伯： (向校長) 唔係，森仔好聽話...(向森仔) 快啲打開佢喇...

說書人： 森仔好唔情願咁終於打開成績單。咦！？氣氛突然變時好凝重。

林伯： 你成績單上面...寫住咩呀？

森仔： 空白！？

(混亂音樂入)